

12. oktober 2023

UKA23/132

**Ilulissani imeqarfiup siunissami nunap qeriuannartup aakkiartuaarnerani
atuutiinnarsinnaanera qulakkeerneqarsinnaanersoq kiisalu Amittorsuup tasia imeqarfissatut
periarfissatut tulluussinnaanersoq pillugu Naalakkersuisut nalunaarusicqullugit
peqquneqarnissaannik siunnersuut**

(Inatsisartuni ilaasortaq Aqqalu.C.Jerimiassen, Atassut)

Siullermik siunnersuuteqartoq Siumumiik siunnersuutaanut qutsavigaarput imatullu
oqaaseqaateqassalluta:

Siunnersuuteqartoq ugguuna ilumoorpoq, tassa ukiuni kingullerni silaannaap allanngornera
ataatsimut isingalugu siammasissumik sunniuteqarpoq, ilaatigut nunap ilusai sumiiffinni
assigiinngitsuni allanngorarput, tassa nunap qeriuannartup allanngornerata takussutissartaasa
ilaat

Tamanna unammilligassanik assignngitsunik pilersitsisoq ilisimavarput, ilaatigut
siunnersuuteqartup tamanna tunngavilersuutimini tikitaani takuneqarsinnaavoq, aammattaarli
ilisimallutigu ilaatigut tatsit siusinnerusukkut isikkumikkut allanngorsinnaanngitsutut isigisagut
maanna tasertaarullutik, tassa tissorlutik piusut takussaasalermata, aammali silap
naatsorsoruminaannerujussua pissutaalluni ilaatigut sialuk sivisuumik atuuttalersoq ilisimavarput,
tamannalu siusinnerusumut sanilliullugu ilaatigut unammillernarsinnaasunik pilersitsisarpoq,
taamaasillunilu ilaatigut sialoqarfiup nalaani soorunami tatsit qaffannerusartut ilisimavarput
taamaasillunilu tatsit qalorsartaniittut piulersinnaasarlutik.

Siumumiit pingaartittorjuuarput nunatsinni inoqarfiit sapinngisamik pitsaanerpaamik
imeqarnikkut pilersorneqassasut, tassa avatangiisit tunngavigalugit ilaatigut tatsit imeqarfiusut
pivagut, aammali ilisimallutigu inoqarfeqarmat amerlasuunit tatsiminngaannik
pilersorneqarsinnaanngitsunik taamaasillutillu periarfissat allat atorlugit imermik
pilersorneqarlutik.

Imeq pitsaasoq inuiaqatigiinnut siammasissumik atugassiisutigisariaqarparput taamaakkaluartoq
ajoraluartumik nalaanneqartuartarpoq imermik qalaasseqqaarnissamik
piumasaqaateqartoqartarnera, tamatumuuna takusinnaasarparput imeq pitsaasoq
siammasissumik innuttaasunut atugassioisutigisartagarput ilaatigut pitsaassuseq
eqqarsaatigalugu unammilligaasanik pitsaassutsimut angummanniarnermi peqartartarmat.

Siunnersuutip tunngavia Ilulissani imeqarni arnermut tunngavoq, tamannalu siunnersuuteqartup tunngavilersuina eqqarsaatigissagaanni paasinarluarluni, pingaartumik Illoqarfik angisooq imermillu annertuumik pitsaasumillu pisariaqartitsisusooq uani pineqarmat.

Tunngaviatigut Naalakkersuisut nalunaarusioqqullugit siunnersuutaavoq, tamannalu apeqquserusungilarput.

Kisianni siunnersuuteqartup tikitaatut silap allanngoriartornera allallu pissutsit pequtaallutik siammasissumik nalunaarusiortoqarnissaa assut soqutiginarparput, ilaatigut ilisimagatsigu assersuutigalugu Uummannami taseq sillimmataasoq imeqarfimmu §37 malillugu apeqquteqaat nr. 170-2022 apeqquteqaatigineqarnerata kingorna Naalakkersuisup akissutaani ersimmat 2019-mili misissuineq kingulleq pisimasooq, tassanilu misissuinerme imeq assigiinngitsunik bakteriaqartoq paasineqarsimalluni, ilaatigullu aatsaat pisariaqalerpat imeq suliarineqaqqaarluni imerneqarsinnaalissasoq akissuteqaammi takuneqarsinnaalluni.

Illoqarfiit soorunami ilaatigut pitsaasumik tatsinik imeqarfearput, ilaatigullu qularnanngitsumik unammillerfiulersinnaasunik peqassasut naatsorsuutiginarluni, soorlu nunap qeriuannartup aakkiartornerata kinguneri tassani pissutaasimallutik.

Siunissaq qaninnerusooq ungasinnerusorlu eqqarsaatigalugu soqutiginarput isigaarput siammasinnerusumik nalunaarusiortoqarnissaa, soorunami siunnersuuteqartup siunnersuuta apeqqusernagu tamanna suliaasaq pisinnaasoq kissaatigalutigu.

Taamaammat siunnersuutip taasissutissartaa allannguuteqassasoq kaammattuutigaarput tunngavilersuutit oqaatigisagut aallaavigalugit.

Imatullu siunnersuuteqarluta:

Silaannaap kissatsikkiartornerata kingunerisaanik inoqarfinni imeqarfiit immikkut isiginiarneqarsinnaasut atuutiinnarnissaasa, kiisalu periarfissat allat qanoq tulluussarneqarsinnaanerata pillugu Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq Inatsisartunut UKA 2024-mi agguanneqassaaq.

Taamatut oqaaseqaateqarluta siunnersuut tunngaviatigut taperserparput ataatsimiititaliamullu susassaartumut ingerlateqqillutigu, allannguutissatullu.

Qulequtaanut siunnersuuterput ilanngullugu ataatsimiititaliami nalilersorneqarumaartoq kissaatigaarput.

Jens Kristian Therkelsen, Siumut